

## I - ARABAKO BATZAR NAGUSIAK ETA ARABAKO LURRALDE HISTORIKOAREN FORU ADMINISTRAZIOA

Arabako Foru Aldundia

### ENPLEGU, MERKATARITZA ETA TURISMO SUSTAPENAREN ETA FORU ADMINISTRAZIOAREN SAILA

**Foru Agindua 99/2019 otsailaren 19koa, Arabako eskulangintza sektorean inbertsioak egiteko, 2019ko ekitaldirako, laguntzen deialdia onartzen duena**

Enplegu, Merkataritza eta Turismo Sustapenaren Zuzendaritzak, bere eskumenen eremuan, enplegua sortzea, prestakuntza, turismo sustapena eta merkataritza eta eskulangintza bultzatzea bilatzen duten ekintzak eta ekimenak gauzatzeko, hori dena Arabako Lurralde Historikoan jardura ekonomikoa pizteko.

Abenduaren 31ko 51/2013 Foru Dekretuaren bidez, Arabako eskulangintza sektorea arautu eta xedatu zen dirulaguntzak eman lekizkiekeela eskulangileei edota eskulangintza enpresei euren egitura nahiz errentagarritasun, kudeaketa edo lehiakortasuneko baldintzak hobetzeko jardueretarako.

Eskulangintza sektorearen espezifikotasuna dela eta, Arabako Foru Aldundiko Enplegu, Merkataritza eta Turismo Sustapenaren eta Foru Administrazioaren Sailak funtsezkotzat jo du sektoreko elkarte, autonomo eta ETEen inbertsioetarako laguntza neurriak ezartzea, beren azpiegiturak eta ekipamendua hobetu ditzaten eta, hartara, Arabako eskulangintza sektorea, oro har, lehiakorrago izan dadin.

Horretarako, 51/2013 Foru Dekretuaren 6. artikulua aplikatuz eta sailaren helburuak betetzeko, Arabako Foru Aldundiko Enplegu, Merkataritza eta Turismo Sustapenaren eta Foru Administrazioaren Sailak uste du komenigarria dela Arabako eskulangintza sektorean inbertsioak egiteko laguntzak orain deitzea. Programa hau ez da jardura bakartu bat, aitzitik ekonomia sustatzeko Arabako Lurralde Historikoaren politikaren esparruan kokatzen da.

Horregatik, dagozkidan ahalmenak erabiliz, hauxe

#### XEDATZEN DUT

Lehenengoa. Onartzea Arabako eskulangintza sektorean inbertsioak egiteko laguntzen deialdi publikoa 2019ko ekitaldirako, zeina Foru Agindu honi atxikitzen baitzaio.

Bigarrena. Foru Agindu honek arautzen dituen dirulaguntzak Arabako Foru Aldundiaren 2019ra luzatutako 2018ko aurrekontuko 30.5.02.36.02.770.00.02 aurrekontu partidaren kontura ordainduko dira, 11.091,39 euroko zenbatekoz horniturik dagoela eta xedapen erreferentzia 105. 511/000 duela.

Hirugarrena. Ebazpen honek administrazio bidea agortzen du. Beraren aurka, bat etorriz administrazio publikoen administrazio prozedura erkidearen urriaren 1eko 39/2015 Legeak 123. Artikuluan xedatutakoarekin, aukerako berraztertze errekurtsoa aurkez dakioko Enplegu, Merkataritza eta Turismo Sustapenaren eta Foru Administrazioaren Saileko foru diputatuari, ebazpen hau jakinarazi eta hurrengo egunetik hilabete igaro baino lehen, edo, bestela, zuzenean aurkatu daiteke administrazioarekiko auzietarako jurisdikzioaren aurrean, ebazpen hau jakinarazi eta hurrengo egunetik bi hilabete igaro baino lehen.

Laugarrena. Deialdi hau ALHAOn argitaratuko da eta argitaratu eta hurrengo egunetik aurrera izango du indarra.

Vitoria-Gasteiz, 2019ko otsailaren 19a

*Merkataritza eta Turismo Sustapenaren eta Foru Administrazioaren Saileko foru diputatua*  
**CRISTINA GONZÁLEZ CALVAR**

*Enplegu, Merkataritza eta Turismo Sustapenaren zuzendaria*  
**JUAN FELIPE GARCÍA MIRAVALLES**

## ERANSKINA

### ARABAKO ESKULANGINTZA SEKTOREAN INBERTSIOAK EGITEKO LAGUNTZEN DEIALDIA 2019KO EKITALDIRAKO

#### 1. artikulua. Xedea

Deialdi honek xede du Arabako eskulangintza sektoreari inbertsioak egiteko dirulaguntzak ematea, lehia araubidean, lantegiak eta ekipamendua berritzen laguntzeko, hartara, lehiakorrago izan daitezten eta egiturak eta kudeaketa hobetu ditzaten.

#### 2. artikulua. Aurrekontu partida eta gehienezko zenbateko osoa

Foru Agindu honek arautzen dituen dirulaguntzak Arabako Foru Aldundiaren 2019ra luzatutako 2018ko aurrekontuko 30.5.02.36.02.770.00.02 aurrekontu partidaren kontura ordainduko dira, 11.091,39 euroko zenbatekoz horniturik dagoela eta xedapen erreferentzia 105.511/000 duela.

2.2. Deialdi honetarako zehaztutako aurrekontu partidaren hasierako zuzkidura handitu ahalko da, hasierako aurrekontuaren ehuneko 100eraino, kasuan kasuko aurrekontu transferentzien bidez, baldin eta geldikinik bada Enplegu, Merkataritza eta Turismo Sustapenaren Zuzendaritzaren beste partida batzuetan.

#### 3. artikulua. Onuradunak

3.1. Eskulangileak, eskulangintzako enpresa eta elkarteak eta sektorea ordezkatzan duten gainerako erakundeak, baldin frogatzen badute Arabako Lurralde Historikoan erroldatuta daudela edo bertan dutela zerga egoitza eta, beranduenik 2019ko urtarrilaren 1az geroztik, Arabako Artisauen Erregistro Orokorrean izena emanda badaude edo egun horretan hasita badute bertan alta eskatzeko prozesua, eta eskaera horri ezezkoa eman ez bazaio laguntza lerro honetara eskaerak aurkezteko epea amaitzen denean.

3.2. Ezingo dute dirulaguntzarik jaso Arabako Lurralde Historikoaren dirulaguntzen urriaren 19ko 11/2016 Foru Arauak IV. tituluari aipatzen dituen zehapenekin zigortuak izan direnek eta/edo Foru Arau horretan xedatutako debekuek eragiten dietenak. Emakumeen eta gizonen berdintasunerako otsailaren 18ko 4/2005 Legeak xedatutakoaren arabera, emakumeen eta gizonen berdintasunaren arloan arau hausteak egiten dituztenek ere ezingo dute dirulaguntzarik jaso.

3.3. Onuradunek Ogasunarekiko eta Gizarte Segurantzarekiko zerga betebeharrak egunean eduki beharko dituzte, 58/2004 Foru Dekretuan ezarritakoaren arabera, bai dirulaguntza emateko ebazpena onartzeko garaian, bai dirulaguntza ordaintzeko garaian.

Enpresen kasuan, Gizarte Segurantzako inolako erregimenetan kotizaziorako kontu koderik esleituta ez badute, enpresako bazkide guztiek Gizarte Segurantzarekin egunean egon beharko dute.

3.4. Beren-beregi baztertuko dira Arabako Foru Aldundiaren 2019ko ekitaldirako aurrekontuan Enplegu, Merkataritza eta Turismo Sustapenaren Zuzendaritzaren dirulaguntza izenduenen bat jaso duten eskatzaileak (esleitzeko garaian hitzarmena izenpetuta egon edo ez), baita laguntza lerro honetako lehenagoko deialdien bidez emandako dirulaguntzak ezarritako epean egin edo justifikatu ez dituztenak ere, salbu eta baldintza hori ez betetzeko arrazoiak nahikoa justifikatuta badaude Enplegu, Merkataritza eta Turismo Sustapenaren Zerbitzuaren iritziz.

#### 4. artikulua. Dirulaguntzarako onartzen diren gastuak

4.1. Honako gastu hauek diruz lagungarritzat joko dira baldin ezarritako epean egiten badira:

a) Jarduera egiteko beharrezkoak eta espezifikoak diren ekoizpen tresnak eta makinak erostea, muntatzea eta instalatzea, garraio kostuak barne, bai eta azoketan erabiltzeko olanak eta antzekoak erostea ere.

b) Eskulangintza jarduera modu independentean eta bereizita egiteko izango diren lantegiak eta lokalak ezarri, modernizatu, birgaitu, zaharberritu edo egokitze obra txikien gastua, energia aurrezteko helburuarekin lokalak egokitzearen gastua barne. Obra txiki izango da eraikitze erraz eta apalarengatik eta diru behar gutxiarengatik hartakotzat jo daitezkeenak, besteak beste, eraikin barruko banaketa aldatzen dutenak. Ez dira obra txiki izango erabilera aldaketa dakartenak.

Horiek horrela diruz lagundu ahal izango dira obra hauek:

- Azpiegiturazkoa ez den zati bat eraberritzeko obrak, esaterako, trenkada aldatzea edo kentzea.
- Zoru, sabai, horma, igeltsua, xaflaztatua konpontzeko, zaharberritzeko, aldatzeko edo ordezkatzeko lanak.
- Hoditeria, elektrizitatea, berotze sistema, saneamendua eta beste batzuk instalatzea eta gainerako estalkiak.
- Oztopo arkitektonikoak desagerraraztea helburu duten obrak.

Ez dira inolaz ere diruz lagunduko norberaren etxebizitza hobetzeko diren eta eskulangintza jarduera gauzatzeko baldintzak hobetzeko ez diren obrak. Obrek bi eremu horiei eragiten dietenean, diruz lagungarri izango da lantegirako soilik izango den eraikuntza eta inbertsioen zati proportzionala, baldin lotura zuzena eta agerikoa badute eskulangintza ogibidea gauzatzearekin.

Diruz lagungarri izango dira, orobat, proiektu teknikoaren idazketa eta obra zuzendaritza.

Betiere jarduketa behar adina justifikatuko da eta beharrezkoa izango da, eta bat etorri beharko du, Enplegu, Merkataritza eta Turismo Sustapenaren Zerbitzuaren iritziz, eskatzailearen artisautza jardueraren garapenarekin.

Gastuek ez dute dirulaguntzarik jasoko, besteak beste, kasu hauetakoren bati badagokie:

- Kanpo garraioaren elementuak.
- Bulegoko altzariak.
- Bigarren eskuko ekipoa edo makinak eskuratzea.
- Produktua egiteko behar diren ondasun suntsikorrak, lehengaiak edo gastuak.
- Edozein eratako zergak, lizentziak eta tributuak.
- Lokala edo lantegia erosteko inbertsioak.
- Finantza gastuak.
- Obra handiak, hala nola, oin berriko obrak edo dauden eraikinen azalera, bolumena edo garaiera areagotzen dutenak edo haiek osorik, eta ez zati batean, birgaitzen dutenak.

- Aldizkako gastuak eta/edo errepikatzen direnak nahiz kuota mota oro.
- Materialen gastuak lokala egokitzeko.
- BEZa eta gainerako zeharkako zergak, salbu onuradunak konpentsatu edo berreskuratu ezin baditzake.
- Pertsona edo entitate eskatzaileari lotutako enpresa edo pertsonen bitartez egindako gastuak.
- Dirulaguntzaren xede den jarduerarekin zalantzarik gabe lotu ezin diren edota deialdi bakoitzean ezarritako epean egiten ez diren gastuak.

Enplegu, Merkataritza eta Turismo Sustapenaren Zerbitzuak uste badu gastuen aurrekontua antzeko gastuen batez besteko kostuarekin alderatu eta gehiegizkoa dela, dirulaguntzaren oinarria murriztu ahal izango du, gastuentzako zenbateko egoki eta proportzionalera arte.

4.2. Diruz lagundu daitekeen aurrekontuaren ehuneko 100eraino azpikontratatzeari baimentzen da, betiere Arabako Lurralde Historikoko dirulaguntzen urriaren 19ko 11/2016 Foru Arauak 27. artikuluan ezarritako baldintzak betez.

4.3. Proiektu beraren barruan Enplegu, Merkataritza eta Turismo Sustapenaren Zerbitzuaren iritziz artisautza sektoreko lantegiak eta ekipamendua berritzen nahikorik laguntzen ez duten jardunak badaude, baztertu egin daitezke esleitu beharreko dirulaguntzaren kalkularen ondorioetarako.

#### **5. artikulua. Aplikazio eremua eta jarduerak gauzatzeko epealdia**

5.1. Deialdi honetako onuradunek Arabako Lurralde Historikoan kokatu beharko dituzte diruz lagundutako jardueren emaitzak.

Dirulaguntza jaso dezakete:

- 2019. urtean hasitako inbertsio proiektuetatik, 2019ko azaroaren 29ra arte gauzatzen direnak (egun hori barne).
- 2018ko azken hiruhilekoan hasitako inbertsio proiektuetatik, 2019ko azaroaren 29ra arte gauzatzen direnak, egun hori barne, baldin eta ez badira diruz lagundu artisau sektorerako aurreko deialdietan.

Horren ondorioetarako, fakturazio eguna hartuko da proiektuaren gauzatze eguntzat eta gastua egin den eguntzat.

#### **6. artikulua. Dirulaguntzen zenbatekoak eta mugak**

6.1. Inbertsioari dagokionez, 4.1.a) artikulurako gutxieneko inbertsioa 200,00 euro (zerga oinarria) izango da, eta b) idatz zatirako, berriz, 1.000,00 euro (zerga oinarria).

6.2. Gehieneko zenbateko eta ehuneko hauen arabera ezarriko da dirulaguntza:

- 4.1.a) idatz zatian ezarritako inbertsioetarako, diruz lagundu daitekeen aurrekontuaren ehuneko 80ko dirulaguntza emango da; gehienez ere 3.000,00 euro, onuradun bakoitzeko.
- 4.1.b) idatz zatian ezarritako inbertsioetarako, diruz lagundu daitekeen aurrekontuaren ehuneko 40ko dirulaguntza emango da; gehienez ere 4.000,00 euro, onuradun bakoitzeko.

6.3. Interes eta/edo eragin ekonomiko bereziko kasuetan, ordea, Enplegu, Merkataritza eta Turismo Sustapenaren Zerbitzuak muga horiek gainditzea proposatu ahal izango du. Muga horiek beharatu ere egin ahal izango ditu balorazio batzordeak, desoreka nabarmena baldin badago aurrekontuko baliabideen eta aurkeztutako proiektuen kopuruaren eta kalitatearen artean.

6.4. Eskatzailea Enplegu, Merkataritza eta Turismo Sustapenaren Zuzendaritzaren beste laguntza programa batzuetan onuradun atera bada, programa honen kostura onartutako

antzeko izaerako proiektuetan, dirulaguntzaren oinarria doituko da araudi honetan ezarritako gehieneko mugak ez gainditzeko.

#### **7. artikulua. Prozedura bideratzeko eskumena duten organoak**

7.1. Prozedura Enplegu, Merkataritza eta Turismo Sustapenaren Zerbitzuak bideratuko du.

7.2. Balorazio batzordea honela osatuta egongo da:

- Lehendakaria: Enplegu, Merkataritza eta Turismo Sustapenaren zuzendaria, edo hark eskuordetzen duen pertsona.
- Kidea: Enplegu, Merkataritza eta Turismo Sustapenaren Zerbitzuaren burua, edo hark eskuordetzen duen pertsona.
- Idazkaria: Enplegu, Merkataritza eta Turismo Sustapenaren Zerbitzuko teknikari bat.

#### **8. artikulua. Eskaerak aurkezteko epea eta modua**

8.1. Eskaerak Arabako Foru Aldundiko Erregistro Orokorrean aurkeztu behar dira (Probintzia plaza, 5 - 01001, Gasteiz), edo itundutako udalen erregistro orokorretan, eta Enplegu, Merkataritza eta Turismo Sustapenaren Zerbitzuari zuzendu behar zaizkio (Arabako Foru Aldundiko Enplegu, Merkataritza eta Turismo Sustapenaren Zuzendaritza); edonola ere, administrazio prozedura erkidearen urriaren 1eko 39/2015 Legeak ezarritakoa bete beharko da.

8.2. Eskaerak aurkezteko epea laguntza hauen deialdia indarrean sartzean hasiko da eta argitaratzen den egunetik 20 egun natural igarotakoan amaituko da.

8.3. Deialdi honetan arautzen diren laguntzetarako eskaerak egiteko erabili behar diren ereduak eskuragarri daude Enplegu, Merkataritza eta Turismo Sustapenaren Zerbitzuan (Probintzia plaza 5, 01001 Gasteiz) eta Arabako Foru Aldundiaren webgunean. Behar bezala eta osorik beteta, sinatuta eta zigilatuta aurkeztu beharko dira, eta betiere agiri hauek erantsita eduki beharko dituzte:

1. NANaren fotokopia.
2. IFZren fotokopia eskulangintza enpresen eta elkarten eta sektorea ordezkatzeko duten gainerako erakundeen kasuan.
3. Gizarte Segurantzak egindako ziurtagiria, harekiko betebeharrak betetzean egunean dagoela frogatzekoa. Ziurtagiri horren ordezkari baimena eman ahalko zaio organo kudeatzaileari administrazio eskudunetatik datu horiek zuzenean bildu eta bidaltzeko.
4. Arabako Lurralde Historikoan erroldatuta egotearen ziurtagiria.
5. Eskatutako dirulaguntzaren xede diren jarduerak deskribatzeko memoria. Bertan datu hauek jarriko dira, besteak beste:
  - Egin beharreko inbertsioen azalpena eta zenbatekoa.
  - Inbertsio horiek egiteko arrazoiak eta inbertsio horiek ekoizpen prozesuan zertarako erabiliko diren.
  - Lantegiak egokitzeko obrak egiteko proiektuak badira, aurreikusitako inbertsioak egin aurretik lantegia nola zegoen erakusten duten argazkiak.
6. Lana egingo duen edo egin duen kanpoko profesionalaren edo hornitzailearen eskaintzaren fotokopia (proformako edo behin betiko fakturak, kanpoko aurrekontua edo, halakorik balego, kontratu sinatua). Dirulaguntzak kalkulatzeko, ez dira aurrekontutzat onartuko eskatzaileak egindako gastu kalkulak.
7. Eskatutako 3 eskaintzen fotokopiak, aholkularitzako edo laguntza teknikoko enpresei 15.000,00 euroko edo gehiagoko zerbitzuak eskatu bazaizkie. Horrekin batera, hautatu den

eskaintza ez bada ekonomiaren aldetik onuragarriena, zergatik aukeratu den azaltzen duen justifikazioa. Proiektua gauzatzen hasitakoan, diruz lagundutako ekintzaren baten benetako gastuak 15.000,00 euroko muga gainditzen badu, nahiz eta gastua onartu zenean zenbatekoa txikiagoa izan, hiru eskaintza aurkeztu beharko dira.

8. Erantzukizunpeko adierazpena deialdi honen 3. artikuluan xedatutako baldintzak betetzea frogatuz.

8.4. Administrazio prozedura erkidearen urriaren 1eko 39/2015 Legeak 73. eta 30.2 artikuluan eta Arabako Lurralde Historikoko dirulaguntzen orokorraren urriaren 19ko 11/2016 Legeak 21.5 artikuluan xedatutakoaren arabera, aurkezteko unean eskaerak ezarritako baldintzak betetzen ez baditu, organo eskudunak hura zuzentzeko eskatuko dio interesdunari, gehienez 10 egun balioduneko epe luzaezinean, eta adieraziko dio egin ezean eskaeran amore eman duela ulertuko duela.

### **9. artikulua. Dirulaguntzak emateko irizpide objektiboak**

9.1. Foru Agindu honetan aurreikusitako laguntzak lehia araubidean izapidetuko dira, eta honako lehentasun ordena hau ezarriko da, 4.1. artikuluan ezarritako jardute lerroen arabera:

1º. Lehenbizi, 4.1. a) idatz zatian ezarritako inbertsioei dagozkien gastuak ordainduko dira, eta inbertsio horiek lehentasunaren arabera ordenatuko dira, hurrengo idatz zatian ezarritako irizpideak oinarritzat hartuta.

2º. Halaber, 4.1.a) idatz zatian jasotako inbertsioak finantzatzeko behar guztiak bete ondoren, eta orduan baino ez, baldin aurrekontu krediturik sobera badago, 4.1.b) idatz zatian ezarritako inbertsioei dagozkien gastuak ordainduko dira. Inbertsio horiek ere lehentasunaren arabera ordenatuko dira, hurrengo idatz zatian ezarritako irizpideak oinarritzat hartuta.

9.2. Irizpide objektibo hauek erabiliko dira, azkenean onartzen diren eskaeretatik dirulaguntza zeintzuei emango zaien erabakitzeko:

1) Enpresaren lehiakortasunaren hobekuntza.

Irizpide hau ebaluatzerakoan kontuan hartuko dira honako emaitza hauek ahalbidetzen dituzten jarduketak: produktuaren berrikuntza, bereizketa, kalitatea areagotzea eta enpresaren kudeaketan eta IKTen erabileran hobekuntzak egitea, irudia, marka, komunikazioa eta bezeroentzako arreta hobetzea, merkatuak handitzea, Arabako eskulangintza beste merkatu batzuetan hedatzea...

2) Enpresaren konpromisoa artisautzako jarduerari eusteko.

Irizpide hau ebaluatzerakoan kontuan hartuko dira honako inguruabar hauek: enpresa berriak abian jartzea, bokazio berriak sustatzea, galtzeko zorian edo oso murriztuta dauden eskulangintzako jarduerari eustea, jardueran lanean emandako urteak, etengabeko prestakuntza...

3) Justifikatutako ehunekoa (zenbateko onartua), eskatzaileak onuradun gertatu zen laguntza lerro honen azken deialdian esleitutako zenbatekoari dagokionez.

Irizpide hori honela ebaluatuko da:

- Ehuneko 90 edo gehiagoko justifikazioa, 15 puntu.
- Ehuneko 60 edo gehiagoko eta ehuneko 90etik beherako justifikazioa, 10 puntu.
- Hirugarrena laguntza lerro honen onuradun gertatzen den lehen aldia, 10 puntu.
- Ehuneko 60tik beherako justifikazioa, 0 puntu.

4) Laguntza eskaeraren xede diren ekintzak azaltzeko memoriaren nahiz eskabidearen beraren argitasuna, xehetasuna eta askitasuna eta bertan eta lehen unetik hura aztertzeko behar den dokumentazio osoa sartzea.

Irizpide hori honela ebaluatuko da:

- Eskabide osoa eta memoria xehea, 15 puntu.
- Lehen unean osatu gabeko eskabidea eta memoria xehea, 10 puntu.
- Eskabide osoa baina xehetasun urriko memoria, 5 puntu.
- Xehetasun urriko memoria duen eta lehen unean osatu gabe dagoen eskabidea, 0 puntu.

5) Proiektuaren eraginaren zenbaterainokoa.

Irizpide hau baloratzeko kontuan hartuko dira proiektuari lotutako lanaldi osoko lanpostuen sorrera eta fakturazioaren gehikuntza.

Irizpide horiek honela haztatuko dira:

- 1. irizpidea: 40 puntu arte.
- 2. irizpidea: 20 puntu arte.
- 3. irizpidea: 15 puntu arte.
- 4. irizpidea: 15 puntu arte.
- 5. irizpidea: 10 puntu arte.

9.3. Onuradunak hautatzeko eta bakoitzari dagokion zenbatekoa zehazteko, Diputatuen Kontseiluaren martxoaren 15eko 26/2016 Foru Dekretuaren seigarren oinarrian ezarritakoari jarraituko zaio.

#### **10. artikulua. Ebazteko eta jakinarazteko epealdia**

10.1. Balorazio batzordeak aztertu egingo ditu jasotako eskaerak, eta dokumentazioa oso-rik ez badago edo nahasteko bidea ematen badu, interesdunari errekerimendua egingo dio akatsak konpondu edo behar diren argibideak eman ditzan hamar egun balioduneko epean, errekerimendua jakinarazten denetik hasita, eta ohartaraziko dio hori egin ezean eskaera bertan behera utzizat joko dela.

10.2. Organo eskudunak, Balioespen Batzordearen proposamenez, bidezko deritzon ebazpena emango du. Ebazteko epea Diputatuen Kontseiluaren martxoaren 15eko 26/2016 Foru Dekretuaren seigarren oinarrian ezarritakoaren arabera arautuko da.

10.3. Ebazpenak gutun ziurtatuaren bidez jakinaraziko dira. Nolanahi ere, administrazio prozedura erkidearen urriaren 1eko 39/2015 Legeak ezarritakoaren arabera jardungo da.

10.4. Ebazpen honek administrazio bidea agortzen du. Beraren aurka, bat etorri administrazio publikoen administrazio prozedura erkidearen urriaren 1eko 39/2015 Legeak 123. artikuluan xedatutakoarekin, aukerako berraztertze errekurtsoa aurkez dakioko Enplegu, Merkataritza eta Turismo Sustapenaren eta Foru Administrazioaren Saileko foru diputatuari, ebazpen hau jakinarazi eta hurrengo egunetik hilabete igaro baino lehen, edo, bestela, zuzenean aurkatu daiteke administrazioarekiko auzietarako jurisdikzioaren aurrean, ebazpen hau jakinarazi eta hurrengo egunetik bi hilabete igaro baino lehen.

#### **11. artikulua. Onuradunen betebeharrak**

11.1. Laguntza lerro honen kontura finantzatzen diren jarduketetan Arabako Foru Aldundiaren babesa agerrarazi beharko da leku nabarmenean.

11.2. Dirulaguntzaren xedearekin zerikusia duten komunikazio, publizitate eta zabalkunde ekintza guztiak, ekitaldi publiko nahiz pribatuak, aurkezpen, amaiera ekitaldi eta antzekoak aldeztuz Arabako Foru Aldundiarekin adostu beharko dira, bere irudi korporatiboaren inguruan berak ezartzen dituen jarraibideei jarraituko zaie, eta bi hizkuntza ofizialak erabiliko dira, herri-tarrek hizkuntza aukeratzeko duten eskubidea modu eraginkorrean bermatuz.

## **12. artikulua. Dirulaguntzen justifikazioa eta ordainketa**

12.1. Dirulaguntzen likidazioa kasuan kasuko administrazio ebazpenean adierazten den bezala egingo da, bertan zehazten diren betekizun eta baldintza guztiak bete ondoren.

12.2. Arabako Foru Aldundiak dirulaguntzaren zenbateko justifikatua ordaintzeko betebeharra onartzeko, onuradunak agiri hauek aurkeztu beharko ditu 2019ko azaroaren 29a baino lehen (egun hori barne):

– Egindako jarduerak deskribatzeko memoria. Honako hauek jaso beharko ditu memoria horrek, xehetasun osoz: gauzatutako inbertsioen kontzeptuak eta zenbatekoak; inbertsio horiek egiteko arrazoiak; eta idazki bat, eskaeran aurreikusitakoa zenbateraino bete den azaltzen duena, azkenean egindakoa oinarri hartuta, eta, desbideratzerik izan bada, zein izan diren eta zergatik gertatu diren zehazten duena.

– Fakturak eta froga balio bereko gainerako agiriak, jatorrizkoak zein fotokopia konpultsatutak.

– Diruz lagundutako jarduera finantzatu duten bestelako sarrera eta dirulaguntzen xehetasunak, zenbatekoa eta jatorria adierazita.

– Hiru eskaintzak eta, eskaintzarik merkeena aukeratu ez bada, horren arrazoiak azaltzen dituen justifikazio txostena (bakar-bakarrik partidaren batek eskaera egiteko garaian hiru eskaintza aurkeztera behartzen ez bazuen eta geroago benetako gastuak ezarritako 15.000,00 euroko mugara heldu edo hortik gorakoak izan badira).

Profesionalek igorritako fakturei dagokienez, onuradunak pertsona fisikoen errentaren gaineko zergaren kontura egin behar diren atxikipenen zenbatekoa ordaindu beharko du. Kasu horretan, onartu egingo da justifikatu beharreko ordainketa egiteko betebeharra, eta Arabako Foru Aldundiaren ardura izango da ordainketa horiek egiaztatzea eta dagokion justifikazio txostena egitea. Baldin eta, dirulaguntza ordaindu eta gero, egiaztatzen bada ez direla sartu egin beharreko atxikipenak, dirulaguntza itzultzeko eta hari dagozkion interesak ordaintzeko eskatuko da.

12.3. Onuradunak fakturak Enplegu, Merkataritza eta Turismo Sustapenaren Zerbitzuan 2020ko apirilaren 8a (barne) baino lehen ordaindu izana justifikatu ondoren ordainduko du Arabako Foru Aldundiak dirulaguntzaren justifikatutako zenbatekoa. Zenbateko hori onartutako dirulaguntzaren oinarriaren parekoa edo gehiago izango da, eta formatu hauetako edozeinetan aurkeztu ahal izango da:

– Jatorrizko banku ziurtagiria, ondoko datuak zehazten dituena: ordaintzailea, zenbatekoa, data eta ordainketaren edo transferentziaren hartzailea, eta izenpetuta edota bankuaren zigilua jarrita.

– Jatorrizko ziurtagiria, faktura jaulki duenak sinatuta eta/edo zigilua jarrita, datu hauek zehazten dituena: fakturaren zenbakia, zenbatekoa eta ordainketa data.

– Transferentzia telematikoen aginduak, ordainketa edo transferentzia egiten duen bankuaren zigilua jarrita.

– Posta arruntez jasotako banku laburpenak, jatorrizkoak.

– Posta elektronikoz jasotako banku laburpenak, ordainketa edo transferentzia egin duen bankuaren zigilua jarrita.



— Diruz lagundutako jarduera zehazten duten erosketa edo zerbitzuen agiriak edo ordainagiriak, bidezko kopurua ordaindu dela frogatzen dutenak.

12.4. Oro har, ordainketen frogagiriak jatorrizkoak izan beharko dira, baina fotokopia konpultsatuak ere aurkeztu ahal izango dira.

Ez da onartuko eskudirutan ordaintzea 2019rako indarreko araudian ezartzen den zenbatekoa ez hortik gorakoa (edo horren kontrabalioa atzerriko monetetan).

Aurreko paragrafoan aipatzen den zenbatekoa kalkulatzeko, baldin eta ondasun ematea edo zerbitzua zatikatu bada, eragiketa edo ordainketa guztien zenbatekoak batuko dira.

12.5. Ordainketak arintzeko, unean unerako jarritako epemugak baino lehenago aurkeztu ahal izango dira agiriak.

12.6. Justifikatutako gastuak, guztira, diruz lagundu daitekeen aurrekontua adinakoak izan beharko dira, gutxienez. Diruz lagundu daitekeen aurrekontu horretara iritsi ezean, dirulaguntza proportzioan murriztuko da, eta dagokion kopurua baliogabetuko da.

12.7. Hasieran onartutako diruz lagundu daitekeen aurrekontuaren mugarekin, dirulaguntza jaso dezaketen kontzeptu eta zenbatekoetan aldaketak onartu ahalko dira, dirulaguntza jasoko zuen kontzepturen bat egin gabe geratu bada ere. Betiere desbideratze horiek Enplegu, Merkataritza eta Turismo Sustapenaren Zerbitzuaren oniritzia beharko dute, salbu eta funtsezko aldaketak egiten direnean, halakoei Enplegu, Merkataritza eta Turismo Sustapenaren Zuzendaritzak eman beharko baitie oniritzia.

12.8. Aurreko lerroaldeetan aipatutako agiriak, dirulaguntza ordaintzeko betebeharra onartzeko aurkeztu behar direnak zein hura kobratzeko aurkeztu behar direnak, Arabako Foru Aldundiaren Erregistro Orokorrean aurkeztu ahalko dira (Probintzia plaza 5, 01001 Gasteiz) edo bestela, itundutako udalen erregistro orokorretan. Hori guztia, kalterik egin gabe administrazio prozedura erkidearen urriaren 1eko 39/2015 Legean ezarritakoari.

12.9. 6.2 paragrafoan ezarritako dirulaguntza mugetako edozein aplikatu bada, onargarria izango da, Enplegu, Merkataritza eta Turismoaren Sustapenaren Zerbitzuak txostena aldeztu aurretik txostena eginik, diruz laguntzeko den gastuan murrizketak egitea, esleitutako dirulaguntza aldatu gabe, ordea; alabaina, beharrezkoa izango da betetzea dirulaguntzaren xedea, eta errespetatzea diruz lagundutako gastuaren gutxieneko zenbateko justifikatu beharrezkoa, alegia, operazio honen emaitza: esleitutako dirulaguntzaren gehieneko zenbatekoa zati aplikatutako dirulaguntza ehuneko.

12.10. Lehen aipatutako epeak igaro eta dirulaguntza ordaintzeko betebeharra onartzeko zein dirulaguntza ordaintzeko aurkeztu beharreko dokumentazioa aurkeztu ez bada, edo aurkeztu beharreko guztia aurkeztu ez bada, dirulaguntza gutxitu edo baliogabe utziko da, kasu bakoitzari dagokionaren arabera.

12.11. Jasotako kopuruak itzuli beharko dira eta dagokion berandutze interesa eskatuko da, dirulaguntza ordaintzen den unetik itzuli behar dela erabakitzen den egunera arte, kasu hauetan:

a) Dirulaguntza eskuratu izana ezarritako baldintzak faltsutuz edo dirulaguntza ezin ematea eragin izango zuketena baldintzak ezkutatu.

b) Ez betetzea, osorik edo partez, dirulaguntza funtsatu zuen xedea, jarduera edo proiektua, edo ez jokatzeko dirulaguntza funtsatu zuen jokabidearen arabera.

c) Justifikatu beharra ez betetzea edo behar beste ez justifikatzea, Arabako Lurralde Historikoaren dirulaguntzen urriaren 19ko 11/2016 Foru Arauak 28. artikuluan eta, kasuan kasu, dirulaguntza erregulatzeko arauetan xedatutakoaren arabera.

12.12. Onuradunek gastuen justifikazioak aurkeztu ondoren, Enplegu, Merkataritza eta Turismo Sustapenaren Zerbitzuak in situ egin ahalko ditu bisitak, diruz lagundutako jarduketak

benetan egin direla egiaztatzeko. Bisiten kopurua eskura dauden baliabideen arabera izango da.

12.13. Zenbait kasutan lehenengo emanaldia egin ahalko da, justifikatu beharreko aurrerakin gisa. Hala ere, ez da ezarri emandako funtsak bermatzeko inolako araubiderik.

### **13. artikulua. Dirulaguntzen bateragarritasuna**

Diputatuen Kontseiluaren Oinarri orokorrak onartzen dituen martxoaren 15eko 26/2016 Foru Dekretuak hamahirugarren oinarrian ezarritakoa aplikatuko da. Gainera, jarduketek jaso ditzaketen beste laguntzak, edozein izanda ere laguntza mota eta hura ematen duen organoa edo administrazioa, bateragarriak izango dira Foru Agindu honetako laguntzekin, baldin eta, bai osotara bai diruz lagundutako jarduera bakoitzean, laguntzen baturak ez badu gainditzen diruz lagundutako jardueraren kostua.

### **14. artikulua. Garapena**

Enplegu, Merkataritza eta Turismo Sustapenaren eta Foru Administrazioaren Saileko foru diputatua gaitzen da Foru Agindu hau zuzen garatu, aplikatu eta interpretatzeko behar den erabaki oro hartzeko, eta datuen benetakotasuna eta deialdi honetan araututakoa betetzeko eskatu eta egiaztatu ahal izateko ekintzak burutu ahalko ditu. Horretarako, onuradunek konpromisoa hartzen dute beraiek egindako jardueren inguruan Enplegu, Merkataritza eta Turismo Sustapenaren eta Foru Administrazioaren Sailak eskatzen dizkien datu eta dokumentu guztiak emateko. Era berean, Ogasun, Finantza eta Aurrekontu Sailak, Kontuen Epaitegiak edo beste erakunde eskudun batzuek eskatutako informazioa ere emango dute.

### **15. artikulua. Errekurtsoak**

Deialdi honi eta deialdiaren ondorio diren administrazio egintzei administrazio prozedura erkidearen urriaren 1eko 39/2015 Legeak xedatutako egoeretan eta eran egin ahal izango zaie aurka.

### **16. artikulua. Azken klausula**

Foru Agindu honetan ezarritako prozedura Diputatuen Kontseiluaren martxoaren 15eko 26/2016 Foru Dekretuaren bidez onartutako oinarri orokorretan ezarritakoaren mendean dago, bai eta dirulaguntzen arloan Arabako Lurralde Historikoaren dirulaguntzei buruzko urriaren 19ko 11/2016 Foru Arauak, Dirulaguntzei buruzko azaroaren 17ko 38/2003 Lege Orokorrak eta Dirulaguntzei buruzko azaroaren 17ko 38/2003 Legearen Araudia onartzen duen uztailaren 21eko 887/2006 Errege Dekretuak, 2017rako aurrekontua gauzatzeari buruzko abenduaren 21eko 17/2016 Foru Arauak, administrazio prozedura erkidearen urriaren 1eko 39/2015 Legeak eta dirulaguntzei buruzko ondorengo xedapen guztiek dirulaguntzen arloan arautzen dituzten xedapenen mendean ere.